



UNIVERSITETI “UKSHIN HOTI” PRIZREN

Rruga e Shkronjave Nr. 1, 20000

Prizren, Republika e Kosovës

www.uni-prizren.com

RREGULLORE PËR ZGJEDHJET E PËRGJITHSHME NË UNIVERSITETIN “UKSHIN HOTI” PRIZREN

Prizren, 2022



Bazuar në dispozitat e Ligjit për Arsimin e Lartë Nr. 04/L-037, si dhe dispozitat e Statutit të Universitetit "Ukshin Hoti" Prizren, Këshilli Drejtues i Universitetit "Ukshin Hoti" Prizren, në mbledhjen e mbajtur më datë: 29.07.2022, miraton këtë:

Rregullore për zgjedhjet e përgjithshme në Universitetin "Ukshin Hoti" Prizren

Neni 1

Qëllimi dhe fushëveprimi i rregullores

1. Kjo rregullore ka për qëllim rregullimin e mënyrës së organizimit të zgjedhjeve në Universitetin "Ukshin Hoti" Prizren (më tutje Universiteti) si dhe procedurat zgjedhore në kuadër të këtyre zgjedhjeve.
2. Kjo rregullore zbatohet vetëm për zgjedhjet në organet e Universitetit "Ukshin Hoti" Prizren.

Neni 2

Dispozitat e përgjithshme dhe shkurtesat

1. Të gjitha rregullat dhe procedurat zgjedhore, siç përcaktohen me këtë rregullore, bazohen në Statutin e Universitetit si dhe legjislacionin në fuqi i cili është relevant përkitazi me çështjet që rregullon kjo rregullore.
2. Secila palë e pakënaqur lidhur me procedurat zgjedhore ka të drejtë ankese kundër vendimeve të nxjerra në kuptim të kësaj rregulloreje. Instancë e parë për shqyrtimin e ankesave është Komisioni Zgjedhor i Fakultetit.
3. Ankesa kundër vendimit të Komisionit Zgjedhor të Fakultetit, i parashtrohet Komisionit Qendror Zgjedhor (më tutje KQZ). Vendimi i KQZ-së është përfundimtar.
4. Shkurtesat e përdorura në këtë rregullore kanë kuptimin si në vijim:
 - 4.1. Universiteti - Universiteti "Ukshin Hoti" Prizren;
 - 4.2. KQZ - Komisioni Qendror i Zgjedhjeve;
 - 4.3. KZF - Komisioni Zgjedhor i Fakultetit;
 - 4.4. KF - Këshilli i Fakultetit.

Neni 3

Organet për të cilat mbahen zgjedhjet

1. Zgjedhjet e përgjithshme në Universitet shpallen nga Këshilli Drejtues dhe mbahen duke u bazuar në nenet 44 dhe 73 të Statutit të Universitetit.
2. Zgjedhjet në Universitet organizohen në të gjitha fakultetet për kategoritë si në vijim:
 - 2.1. Anëtarët e këshillave të fakulteteve nga radhët e profesorëve;



- 2.2. Anëtarët e këshillave të fakulteteve nga radhët e asistentëve;
- 2.3. Anëtarët e këshillave të fakulteteve nga radhët e personelit jo-akademik;
- 2.4. Anëtarët e Senatit nga radhët e personelit akademik;
- 2.5. Anëtarët e Senatit nga radhët e personelit jo-akademik;
3. Zgjedhjet për anëtar të Senatit nga radhët e personelit jo-akademik do të mbahen edhe në Administratën Qendrore të Universitetit.

Neni 4

Personeli që ka të drejtë të marrë pjesë në zgjedhje

1. Në zgjedhjet të cilat zhvillohen në Universitet, në kategoritë e përcaktuara në nenin 3 të kësaj rregulloreje kanë të drejtë të kandidohen i gjithë personeli i zgjedhur i Universitetit në marrëdhënie të rregullt pune. Personeli akademik i Universitetit, në kuptim të këtij paragrafi përfshin kategoritë e përcaktuara në nenin 167, paragrafi 2 të Statutit si në vijim:
 - 1.1. Profesor i rregullt
 - 1.2. Profesor i asocuar;
 - 1.3. Profesor asistent;
 - 1.4. Asistent;
 - 1.5. Lektorë dhe korepetitorë.
2. Personel akademik i Universitetit, në kuptim të nenit 167, paragrafi 2 të Statutit, konsiderohen të gjithë ata/ato të cilët kanë fituar thirrjen përkatëse akademike nga Senati i Universitetit, duke pasur parasysh ditën e votimit në Senat.
3. Përrjashtim nga paragrafi 2 i këtij neni bëhet për personelin e zgjedhur për herë të parë në Universitet, dhe që nuk mund të pajisen me kontratë të rregullt pune deri në një afat të caktuar (fillimi i semestrit dimëror ose veror). Kjo kategori e personelit që pritet të themeloj marrëdhënie të rregullt pune në Universitet në afatin e përcaktuar siç parashihet në këtë paragraf, nuk kanë të drejtë të kandidohen, të zgjedhen dhe as të votojnë në zgjedhjet të cilat mbahen sipas kësaj rregulloreje.
4. Kriteret e njëjta të parapara në paragrafin 3 të këtij neni, zbatohen edhe ndaj personelit administrativ i cili deri në momentin e regjistrimit për pjesëmarrje në zgjedhje nuk është i pajisur me kontratë/themelim të marrëdhënies së rregullt të punës në Universitet.



Neni 5

Mandatet e fituara nga zgjedhjet në Universitet

1. Të gjithë ata të cilët fitojnë mandat dhe përfaqësohen në organet përkatëse brenda Universitetit, nga zgjedhjet e mbajtura sipas kësaj rregulloreje, e mbajnë mandatin e tyre bazuar në Statutin e Universitetit.
2. Në rast të dorëheqjes, ndërprerjes së kontratës/humbjes së Statutit të personelit akademik, pensionimit, vdekjes, marrjes së mandatit apo humbja e mandatit për shkak të ndonjë arsyeje tjetër, mandati do t'i takojë personit të parë në listën e pritjes sipas regjistrit të rezultatit të zgjedhjeve. Ky paragraf vlen vetëm për anëtarët e Këshillave të Fakulteteve.
3. Në rastet kur nuk ka persona në dispozicion nga rezultatet e zgjedhjeve si në paragrafin 2 të këtij neni, fakulteti përkatës, do të mbajë zgjedhjet për plotësimin e mandateve vakante sipas procedurave të njëjta të përcaktuara në këtë rregullore, më së largu 10 ditë pas mbetjes vakante të pozitës.

Neni 6

Kufizimet në të drejtën e zgjedhjes

1. Sipas nenit 167 paragrafi 2 të Statutit të Universitetit, personeli në marrëdhënie të rregullt pune, i cili është i zgjedhur apo emëruar në ndonjë institucion tjetër publik, nuk ka të drejtë për t'u zgjedhur në organe drejtuese, por ka të drejtë për të votuar për kategoritë e përcaktuara në këtë rregullore.
2. Personeli akademik i zgjedhur apo emëruar në një funksion tjetër publik në kuptim të paragrafit 1 të këtij neni, nënkupton zgjedhjen apo emërimin si në vijim: President i Republikës së Kosovës; Deputet në Kuvendin e Kosovës; Anëtar i Qeverisë së Republikës së Kosovës; Anëtar i Gjykatës Kushtetuese të Republikës së Kosovës; Funkionarët e emëruar nga Kuvendi, Presidenti i Republikës dhe titullarët apo anëtarët e organeve drejtuese kolegjiale të institucioneve të pavarura dhe të agjencive të pavarura; Funkionarët e emëruar nga Presidenti; Anëtarët e Këshillit Prokurorial të Kosovës apo funksionet e tjera në sistemin e drejtësisë; Sekretarët e Përgjithshëm në Ministri; Kryeshefat e Agjencive të Pavarura.
3. Përrjashtim nga kategoria e përcaktuar në paragrafin 2 të këtij neni, bënë i gjithë personeli akademik të cilët ofrojnë këshilla për institucione publike, si këshilltar, konsulent apo janë anëtarë të komisioneve profesionale dhe grupeve të ndryshme të ekspertëve.



4. Anëtarët e këshillave të fakulteteve nga radhët e personelit jo-akademik nuk mund të zgjedhen anëtarë të Senatit.
5. Me qëllim të shmangies së konfliktit eventual të interesit, të drejtë për t'u zgjedhur në organet drejtuese të Universitetit, sipas këtij neni nuk kanë të gjithë ata që përfaqësojnë dhe mbrojnë Universitetin në organet administrative dhe gjyqësore, në të cilat organe vendimet e Universitetit mund të kontestohen nga palët e pakënaqura.
6. Organe drejtuese në kuptim të paragrafit 1 të këtij neni përfshijnë përfaqësimin në organet si në vijim: Këshill të Fakultetit; Prodekan; Dekan; Prorektor; Rektor; Senat dhe Këshill Drejtues.
7. Për pozitat Prodekan; Dekan; Prorektor; Rektor; Anëtar i Senatit dhe Anëtar i Këshillit të Fakultetit nuk mund të zgjedhën anëtarët e Këshillit Drejtues të Universitetit, të cilët janë nën mandat të rregullt, përveç nëse paraprakisht japin dorëheqje. Në rast të dorëheqjes së anëtarit të Këshillit Drejtues, Senati i Universitetit i cili është në mandat, zgjedh anëtarin e ri të Këshillit Drejtues, në përputhje me Rregulloren e punës së Senatit.
8. Në rastet e kontestueshme, në lidhje me të drejtën për të votuar ose të drejtën për kandidim, vendimi mund të ankimohet në KQZ.
9. Lidhur me ankesën e ushtruar sipas nenit 2 të kësaj rregulloreje, KQZ, nxjerr vendim në formë të shkruar dhe duhet ta arsyetoj siç parashihet me dispozitat përkatëse të Ligjit për Procedurën e Përgjithshme Administrative. Vendimi i KQZ-së është përfundimtar në procedurë administrative.

Neni 7

Rregullat, procedurat zgjedhore dhe përbërja e Këshillave të Fakulteteve

1. Çdo fakultet ka Këshillin. Anëtarët e Këshillit janë:
 - 1.1. Dekani;
 - 1.2. Prodekani (ët);
 - 1.3. Deri në 15 anëtarë të zgjedhur nga radhët e profesorëve të fakultetit;
 - 1.4. Deri në 2 anëtarë të zgjedhur nga radha e asistentëve të fakultetit;
 - 1.5. Një anëtar i zgjedhur nga personeli jo-akademik i fakultetit;
 - 1.6. Një përfaqësues i studentëve i zgjedhur nga Këshilli i Studentëve të Fakultetit.
2. Anëtarë të Këshillit të Fakultetit zgjedhen deri 15 profesorë të cilët kanë thirrjen akademike profesor i rregullt, profesor i asocuar, profesor asistent, me kusht që thirrjen akademike ta kenë fituar nga Senati i Universitetit, para shpalljes së zgjedhjeve në Universitet sipas kësaj rregulloreje.



3. Në fakultetet ku numri i përgjithshëm i profesorëve, siç përcaktohet në paragrafin 2 të këtij neni nuk e kalon numrin 15, të gjithë profesorët të cilët regjistrohen/aplikojnë për të fituar mandatin në Këshillin e Fakultetit, mandatohen automatikisht si anëtarë të Këshillit të Fakultetit.
4. Numri i asistentëve të zgjedhur në Këshillin e Fakultetit është më së shumti 2 (dy) anëtarë.
5. Në fakultetet ku numri i përgjithshëm i asistentëve, siç përcaktohet në paragrafin 4 të këtij neni, nuk e kalon numrin 2 (dy), të gjithë asistentët që regjistrohen/aplikojnë për të fituar mandatin si anëtar të Këshillit të Fakultetit, mandatohen automatikisht anëtar të këtij Këshilli.
6. Pavarësisht dispozitave të tjera të kësaj rregulloreje, anëtari i Këshillit të Fakultetit, i cili fiton mandatin si anëtar i këtij organi dhe ndërkohë emërohet Dekan ose Prodekan i Fakultetit përkatës, mandati i fituar tij/saj nuk zëvendësohet.
7. Zgjedhjet për anëtarë të KF bëhen në bazë të listës prioritare të votave të fituara sipas kësaj Rregullore.
8. Për zgjedhjen e anëtarëve të Këshillit të Fakultetit nga radhët e profesorëve (profesor i rregullt, profesor i asocuar dhe profesor asistent), të drejtë vote kanë të gjithë profesorët që janë në marrëdhënie të rregullt pune në fakultet, sipas kësaj rregulloreje.
9. Për zgjedhjen e anëtarëve të Këshillit të Fakultetit nga radhët e asistentëve, të drejtë vote kanë të gjithë asistentët që janë në marrëdhënie të rregullt pune në fakultet, sipas kësaj rregulloreje.
10. Për zgjedhjen e anëtarit të Këshillit të Fakultetit nga radhët e personelit jo-akademik, të drejtë vote kanë i tërë personeli jo-akademik në marrëdhënie të rregullt pune në fakultet.
11. Një përfaqësues nga radha e studentëve në Këshillin e Fakultetit, i cili zgjedhet sipas propozimit të Këshillit të Studentëve të Fakultetit në pajtim me dispozitat e Rregullores mbi zgjedhjet e studentëve dhe Punën e Parlamentit dhe Këshillave të Studentëve.
12. Sekretari i Fakultetit është procesmbajtës i Këshillit të Fakultetit dhe është përgjegjës për ligjshmërinë e punës së Këshillit të Fakultetit.

Neni 8

Verifikimi i mandateve të anëtarëve të Këshillit të Fakultetit

1. Këshilli i Fakultetit në mbledhjen e parë të tij, bënë verifikimin e mandateve të anëtarëve të Këshillit të Fakultetit, në bazë të raportit të Sekretarit të fakultetit për



rregullsinë e zgjedhjes së anëtarëve të Këshillit të Fakultetit, me propozim për miratimin e mandatit.

2. Votimi për raportin sipas paragrafit 1 të këtij neni bëhet në tërësi nëse nuk është kontestuar asnjë mandat. Në rast se ndonjë mandat kontestohet, së pari votohet për të gjitha mandatet e pakontestueshme, e pastaj ndaras votohet për çdo mandat që kontestohet.
3. Kandidatit për anëtar të Këshillit të Fakultetit që i është kontestuar mandati ose i është shtyrë vendimi për verifikimin e mandatit, ka të drejtë të vazhdojë pjesëmarrjen në mbledhjet e Këshillit të Fakultetit, por pa të drejtë vote.
4. Në rast të pakënaqësisë përkitazi me verifikimin e mandateve për anëtarët e Këshillit të Fakultetit, kandidati/ja që i kontestohet mandati, ka të drejtë ankese në KQZ sipas dispozitave të kësaj rregulloreje. Vendimi i KQZ-së është përfundimtar në procedurë administrative.
5. Pas verifikimit të mandatit, anëtarët e Këshillit të Fakultetit e nënshkruajnë deklaratën etike si vijon: *"Deklaroj se do t'i kryej detyrat me nder dhe me besnikëri, me drejtësi dhe pa anim, me ndërgjegje dhe përgjegjësi, se do t'i përfaqësoj me ndërgjegje dhe përkushtim interesat e Fakultetit dhe të Universitetit në përgjithësi, si dhe do t'i përmbahem Statutit të Universitetit dhe legjislacionit të aplikueshëm në Republikën e Kosovës"*.

Neni 9

Zgjedhjet për Senat, personelin akademik dhe jo akademik

1. Një anëtar i personelit akademik nga secili Fakultet zgjedhet anëtar i Senatit.
2. Përfaqësuesi i fakultetit në Senat zgjedhet nga personeli akademik i secilit Fakultet siç përcaktohet në Statut, respektivishtneni 167, paragrafi 2.
3. Për të qenë mbledhja e vlefshme për zgjedhjen e anëtarit të Senatit nga personeli akademik dhe jo-akademik, duhet të jenë prezent dhe të votojnë së paku gjysma e personelit akademik ose jo-akademik me të drejtë vote.
4. Përfaqësuesi i fakultetit në Senatin e Universitetit, konsiderohet kandidati i cili ka fituar më së shumti vota të të gjithë personelit akademik që marrin pjesë në votim.
5. Për zgjedhjen e përfaqësuesit të Fakultetit në Senat, të drejtë vote ka i tërë personeli akademik në marrëdhënie të rregullt pune në fakultet, në pajtim me dispozitat e kësaj rregulloreje.



6. Përfaqësuesi i stafit jo-akademik në Senat, konsiderohet kandidati i cili ka fituar më së shumti vota të të gjithë atyre që marrin pjesë në votim, nga radhët e personelit jo-akademik në marrëdhënie të rregullt pune në të gjitha fakultetet dhe në Administratën Qendrore të Universitetit.
7. Për zgjedhjen e përfaqësuesit të stafit jo-akademik në Senat, të drejtë vote ka i gjithë personeli jo-akademik në marrëdhënie të rregullt pune në Universitet.
8. Në rast se gjatë votimit për anëtar të Senatit nga rradhët e personelit akademik dhe jo-akademik, të gjithë kandidatë marrin numrin e barabartë të votave, atëherë organizohet raundi i dytë i votimit për zgjedhjen e anëtarëve të Senatit nga personeli akademik dhe jo-akademik.
9. Në rast se ka dy ose më shumë kandidatë me vota të barabarta në raundin e dytë, përzgjedhja e kandidatëve bëhet në praninë e kandidatëve, përmes hedhjes së shortit. Shorti hidhet nga KQZ.
10. Votimi për anëtar të Senatit nga personeli akademik dhe jo akademik bëhet në atë mënyrë që të gjithë kandidatët renditen në fletëvotim, në bazë të alfabetit. Të gjithë ata që marrin pjesë në votim, kanë të drejtë të votojnë vetëm një kandidat për anëtar të Senatit, respektivisht një kandidat nga radhët e personelit jo akademik.
11. Sekretari i Përgjithshëm i Universitetit është anëtar ex-officio i Senatit pa të drejtë vote dhe është përgjegjës për ligjshmërinë e punës së Senatit.
12. Në rast të dorëheqjes, ndërprerjes së kontratës, pensionimit, vdekjes, apo në çfarëdo rasti të mbetjes vakante të mandatit të përfaqësuesit të fakultetit në Senat nga radhët e personelit akademik apo jo akademik, fakulteti përkatës, përkatësisht fakultetet dhe Administrata Qendrore e Universitetit (në rastin e përfaqësuesit në Senat të personelit jo-akademik) mbajnë zgjedhjet për zgjedhjen e anëtarit të ri të Senatit, sipas procedurave të njëjta të përcaktuara në këtë rregullore, më së largu 10 ditë pas mbetjes vakante të pozitës.

Neni 10

Kandidimi për Këshillin e Fakultetit dhe për Senat

1. Anëtar i personelit akademik dhe jo akademik i Universitetit, ka të drejtë të regjistrohet/aplikojë si kandidat për mandatin e caktuar sipas dispozitave të kësaj rregulloreje dhe Statutit. Anëtarët e KQZ-së dhe KZF-së, mund të kandidojnë në zgjedhjet e përgjithshme të Universitetit, vetëm në nivel të Këshillit të Fakultetit, por



jo edhe në pozita menaxhuese dhe qeverisëse të Universitetit (Dekan, Senator apo Rektor).

2. Të gjithë kandidatët e interesuar kanë të drejtë të regjistrohen për të fituar më shumë se një mandat, sipas kësaj rregulloreje.
3. Në qoftë se një anëtar i personelit zgjedhet në më shumë se një organ në Universitet, kandidati para se të filloj ushtrimin e mandatit, përcaktohet se në cilin organ do ta ushtrojë mandatin e tij/saj, në pajtim me dispozitat e kësaj rregulloreje.

Neni 11

Zgjedhja e kryesuesit të përkohshëm të Këshillit të Fakultetit dhe përfaqësuesit të përkohshëm-Dekan në Senat

1. Kryesuesi i përkohshëm i Këshillit të Fakultetit zgjedhet nga kandidatët e propozuar nga anëtarët e Këshillit të Fakultetit, me shumicën e votave të numrit të përgjithshëm të anëtarëve të Këshillit të Fakultetit, në mbledhjen e parë të verifikimit të mandateve të anëtarëve të Këshillit të Fakultetit.
2. Nëse asnjë nga kandidatët e propozuar për kryesues të përkohshëm të KF-së, nuk e merr shumicën e votave të numrit të përgjithshëm të anëtarëve, atëherë organizohet raundi i dytë i votimit, për dy kandidatët me numrin më të madh të votave. Në rast se rezultojnë me shumë se dy kandidatë me vota të barabarta, atëherë propozimi për tu votuar bëhet sipas shortit. Shorti organizohet nga KQZ-ja në praninë e kandidatëve.
3. Në raundin e dytë të votimit, kandidat fitues konsiderohet kandidati-ja icili merr më së shumti vota sipas listës prioritare.
4. Në rast të votave të barabarta mes kandidatëve në raundin e dytë, atëherë nga KQZ-ja organizohet shorti në praninë e kandidatëve.
5. Votimi bëhet në atë mënyrë që të gjithë kandidatët vendosen në një fletëvotim sipas alfabetit dhe të gjithë ata që marrin pjesë në votim, kanë të drejtë të votojnë vetëm për një kandidat.
6. Kryesuesi i përkohshëm i KF-së, është edhe përfaqësues i Dekanit të Fakultetit në Senat deri në zgjedhjen e Dekanit.

Neni 12

Nominimi i kandidatëve për pozitën e Dekanit

1. Çdo anëtar i Këshillit të Fakultetit ka të drejtë të propozojë një kandidat/e për pozitën e Dekanit.



2. Propozimet për kandidatët për Dekan duhet të jenë të arsyetuara mirëdhe të përfshijnë edhe një biografi të shkurtë të kandidatit/es.
3. Kandidatët e propozuar për pozitën e Dekanit duhet të kenë së paku thirrjen akademike Profesor i Asocuar në pajtim me nenin 68, paragrafi 2 të Statutit të Universitetit.
4. Anëtarët e KF mund të votojnë vetëm për një kandidat përmes votimit të fshehtë.
5. Vetëm dy kandidatët më të votuar nga anëtarët e KF mund të nominohen si kandidatë për Dekan për t'u zgjedhur në Senat.
6. Në rast të votave të barabarta, mbahet votimi përfundimtar vetëm për kandidatët të cilët kanë numrin e barabartë të votave.
7. Në rast se edhe pas raundit përfundimtar rezultati është i barabartë, atëherë, në prani të kandidatëve organizohet hedhja e shortit përmes të cilit shpallet kandidati inominuar për t'u votuar në Senat.

Neni 13

Listat e votuesve

1. Administrata e fakulteteve dhe Administrata Qendrore e Universitetit, ka për detyrë t'i ofrojë Komisionit Qendror Zgjedhor të dhënat e kompletuara të personelit me të drejtë vote, duke pasur parasysh kufizimet në këtë rregullore.
2. Në rast të vonesës ose refuzimit për të dorëzuar të dhënat nga ndonjë Fakultet, ndaj personave përgjegjës do të inicohet procedura disiplinore nga ana e Këshillit Drejtues të Universitetit, pas njoftimit nga ana e Komisionit Qendror Zgjedhor.

Neni 14

Përmbajtja e listës së votuesve

1. Lista e personelit akademik dhe jo akademik me të drejtë vote për Fakultet do të përgatitet nga Sekretarët e Njësive Akademike përkatëse.
2. Lista e personelit të Administratës Qendrore me të drejtë vote do të përgatitet Njësia për Menaxhimin e Burimeve Njësore.
3. Listat e personelit me të drejtë vote, do të përfshijnë të dhënat në vijim:
 - 3.1. Për personelin akademik:
 - 3.1.1. Numri rendor;
 - 3.1.2. Emri dhe mbiemri;
 - 3.1.3. Data, muaji dhe viti i lindjes;
 - 3.1.4. Thirrja akademike;
 - 3.1.5. Fakulteti.



3.2. Për personelin jo - akademik:

3.2.1. Numri rendor;

3.2.2. Emri dhe mbiemri:

3.2.3. Data, muaji dhe viti i lindjes;

3.2.4. Pozita;

3.2.5. Fakulteti /Administrata qendrore.

Neni 15

Regjistrimi i kandidatëve për Këshill dhe Senat

1. Çdo anëtar i personelit akademik apo jo akademik ka të drejtë të kandidohet për anëtar të Këshillit të Fakultetit dhe anëtar të Senatit, përveç rasteve të parapara në nenin 6 të kësaj rregulloreje dhe kufizimet tjera.
2. Procedurat e regjistrimit përgatiten për secilin Fakultet.
3. Regjistrimi i kandidatëve bëhet në ditën e përcaktuar nga KQZ.
4. Dita e regjistrimit duhet të jetë së paku 3 ditë para ditës së zgjedhjeve.
5. Personeli akademik dhe jo akademik që për arsye të caktuara e kanë të pamundur pjesëmarrjen fizike për regjistrim të kandidaturës, duhet t'iu jepet mundësia që të regjistrohen përmes aplikacioneve të shkruara-elektronike.
6. Një formular përkatës për regjistrim, sipas shtojcës 1 të kësaj rregulloreje, do të jetë në dispozicion në dekanat dhe në ueb faqen zyrtare të Universitetit. Pas plotësimit, formulari dorëzohet në e-mailin e sekretarit të Fakultetit përkatës.

Neni 16

Përmbajtja e listës së kandidatëve

1. Lista e kandidatëve të Fakultetit për anëtarë të Këshillit të Fakultetit, Dekan dhe anëtarë të Senatit do të përgatitet nga Sekretarët e Njësive Akadematike përkatëse.
2. Komisioni Qendror Zgjedhor është i obliguar të kontrollojë çdo regjistrim të kandidaturës sa i përket vlefshmërisë, duke iu referuar listës së votuesve dhe dispozitave të këtyre rregullave dhe procedurave të përcaktuara në këtë rregullore.
3. Lista e kandidaturave të administratës qendrore për Senat do të përgatitet nga Njësia për Menaxhimin e Burimeve Njësore.
4. Listat zyrtare të kandidatëve do të verifikohen dhe miratohen nga Komisioni Qendror Zgjedhor për secilin Fakultet dhe Administratën Qendrore, duke përfshirë të dhënat në vijim:
 - 4.1. Për personelin akademik:



- 4.1.1. Numri rendor;
 - 4.1.2. Emri dhe mbiemri;
 - 4.1.3. Data, muaji dhe viti i lindjes;
 - 4.1.4. Numri personal;
 - 4.1.5. Thirrja akademike;
 - 4.1.6. Fakulteti.
- 4.2. Për personelin jo-akademik:
- 4.2.1. Numri rendor
 - 4.2.2. Emri dhe mbiemri;
 - 4.2.3. Data, muaji dhe viti i lindjes;
 - 4.2.4. Numri personal;
 - 4.2.5. Pozita;
 - 4.2.6. Fakulteti/ Administrata Qendrore.
5. Lista zyrtare e personelit që kandidohen, së paku një (1) ditë para zgjedhjeve do të publikohet nga Komisioni Qendror Zgjedhor në dekanatet e Fakulteteve dhe në ueb faqen e fakulteteve dhe atë të Universitetit.

Neni 17

Komisioni Qendror Zgjedhor (KQZ)

1. Komisioni Qendror Zgjedhor do të përmbushë obligimet e veta, sipas Ligjit nr. 04/L-037 për Arsimin e Lartë, Statutit të Universitetit dhe rregulloreve në fuqi.
2. Komisioni Qendror Zgjedhor zgjedhet nga Këshilli Drejtues, me rastin e shpalljes së zgjedhjeve. KQZ është përgjegjës për organizimin dhe mbikëqyrjen e zgjedhjeve të përgjithshme në Universitet, përfshirë edhe zgjedhjet studentore.
3. KQZ, përbëhet nga dy mësimdhënës në marrëdhënie të rregullt pune në Universitet dhe Sekretari i Përgjithshëm i Universitetit. Kryesuesi i KQZ-së, anëtarit tjetër nga radhët e mësimdhënësve, i cili me automatizëm është zëvendës kryesues, kurse Sekretari i Përgjithshëm i Universitetit është sekretar i KQZ-së.
4. KQZ-së i lejoheq që t'i angazhoj deri dy anëtar të personelit të Universitetit si asistues për çështje administrative gjatë periudhës zgjedhore.
5. Anëtarë të KQZ-së nuk mund të jenë: Rektori, Prorektorët, Dekanët, Prodekanët, Anëtarët e Senatit, Anëtarët e Këshillit Drejtues dhe shefat e programeve të fakulteteve të Universitetit.
6. Përgjegjësitë e KQZ-së janë:



- 6.1. përcaktimi dhe zbatimi i dinamikës së zgjedhjeve;
 - 6.2. përgatitja e listave për zgjedhje;
 - 6.3. nxjerrja e vendimeve rreth kundërshtimeve kundër listës së zgjedhjeve;
 - 6.4. çertifikimi i kandidaturave në zgjedhje;
 - 6.5. konstatimi i numrit të përgjithshëm të mandateve;
 - 6.6. vlerësimi i listës së kandidatëve;
 - 6.7. kryesimi i procedurave zgjedhore;
 - 6.8. identifikimi i listave përfundimtare të atyre që kanë të drejtë vote;
 - 6.9. konstatimi i rezultateve të zgjedhjeve;
 - 6.10. shpallja e rezultateve të zgjedhjeve;
 - 6.11. çertifikimi i mandateve;
 - 6.12. zëvendësimi i mandatit;
 - 6.13. koordinimi i komisioneve zgjedhore të Fakulteteve për konstituimin e Këshillave të Fakulteteve.
7. Për të gjitha rastet kur mandati në organet e Universitetit, për personat e zgjedhur sipas kësaj rregulloreje përfundon para kohe, përbërja e njëjtë e KQZ-së dhe KZF-së, janë kompetente për zbatimin e procedurave përkitazi me zëvendësimin e mandatit respektiv.

Neni 18 Ankesat

1. Anëtari i personelit ka të drejtë të ankohet kundër vendimeve të Komisionit Zgjedhor të Fakultetit, sipas procedurave të përcaktuara në nenin 2, paragrafi 2.2 të kësaj rregulloreje.
2. Vendimi lidhur me ankesën sipas paragrafit 1 të këtij neni duhet të merret brenda dy ditëve të punës pas pranimit të ankesës. Vendimi në shkallën e dytë nxirret nga KQZ dhe merret brenda dy ditëve të punës pas pranimit të ankesës dhe është përfundimtar në procedurë administrative.
3. Anëtari i personelit me të drejtë vote për zgjedhjen e organeve përkatëse, ka të drejtë të parashtoj ankesë te Komisioni Qendror Zgjedhor, në lidhje me procedurat e zgjedhjeve.
4. Formulari përkatës, shtojca 2 do të jetë në dispozicion në secilin vendvotim në Fakultete dhe në ueb faqen e Universitetit.



Neni 19

Komisioni Zgjedhor i Fakultetit

1. Komisioni Zgjedhor i Fakultetit përbëhet nga tre anëtarë:
 - 1.1. Sekretari i Fakultetit, kryesues i komisionit zgjedhor exofficio;
 - 1.2. Dy profesorë të fakultetit, të nominuar nga Këshilli i Fakultetit;
2. Zgjedhja e anëtareve të KZF-së, bëhet me shumicë të votave të numrit të përgjithshëm të anëtarëve të Këshillit të Fakultetit.
3. Nëse asnjë kandidat pas votimit të parë nuk ka marrë shumicën e votave, sipas paragrafit 2 të këtij neni, në votimin e dytë garojnë katër kandidatët që kanë marrë më së shumti vota dhe zgjedhen dy kandidatët me numrin më të madh të votave të fituara nga votimi i dytë për secilën prej pozitave të parapara në paragrafin 1, nën paragrafi 1.2 të këtij neni.
4. Procesverbalet e komisionit të zgjedhjeve hartohen dhe nënshkruhen nga kryesuesi dhe anëtarët e KZF-së.
5. Mbledhjet e komisionit zgjedhor të Fakultetit thirren nga kryesuesi i KZF-së me pëlqimin e Komisionit Qendror Zgjedhor.

Neni 20

Data e zgjedhjeve të përgjithshme

1. Këshilli Drejtues shpallë datën e zgjedhjeve të përgjithshme në Universitet dhe në të njëjtën mbledhje zgjedh edhe anëtarët e KQZ-së, sipas dispozitave të kësaj rregulloreje. Zgjedhjet zhvillohen sipas dinamikës së përcaktuar nga KQZ-ja. Në ditën e zgjedhjeve, vendvotimet dhe intervalin kohor të mbajtjes së zgjedhjeve.
2. Komisioni Qendror Zgjedhor në bashkërendim me komisionet zgjedhore të Fakulteteve duhet të shpallin lokacionin e vendvotimeve.

Neni 21

Mënyra e votimit

1. Votuesit me të drejtë vote duhet që personalisht të hedhin votën në kutinë e votimit, në vendvotimin e Fakultetit përkatës.
2. Asnjë votues nuk ka të drejtë të votojë në më shumë se një vendvotim.



Neni 22

Mbikëqyrja e procesit zgjedhor

1. Zgjedhjet duhet të mbahen nga komisionet zgjedhore të Fakulteteve, nën mbikëqyrjen e Komisionit Qendror Zgjedhor.
2. Zgjedhjet mund të monitorohen nga institucione, organizata dhe palë tjera të interesit, në pajtim me Statutin e Universitetit dhe legjislacionin relevant në fuqi.

Neni 23

Procedurat e votimit dhe fletëvotimet

1. Gjatë kohës së votimit, së paku dy anëtarë të Komisionit Zgjedhor të Fakultetit duhet të jenë të pranishëm gjatë gjithë kohës për të siguruar mbarëvajtje të rregullt të procedurave zgjedhore.
2. Komisioni Zgjedhor i Fakultetit duhet të ndërmarrë masa procedurale për mbarëvajtjen e zgjedhjeve, si në vijim:
 - 1.1. Krijimi i një ambienti të sigurt për votim dhe ruajtje të fshehtësisë së votimit;
 - 1.2. Hapja dhe mbyllja e vendvotimeve në kohën e caktuar dhe mbajtja e vendvotimeve hapur gjatë periudhës së caktuar të zgjedhjeve;
 - 1.3. Ofrimi i materialeve të nevojshme për votime;
 - 1.4. Shpërndarja e materialeve zgjedhore;
 - 1.5. Shënimi i procedurave të votimit në protokollin e Komisionit Zgjedhor;
 - 1.6. Vulosja e kutive të votimit;
 - 1.7. Shënimi i numrit të fletëvotimeve dhe numërimi i votave;
 - 1.8. Shënimi i rezultateve të zgjedhjeve

Neni 24

Rrjedha e procedurës zgjedhore dhe të votimit

1. Procedura zgjedhore zhvillohet sipas ecurisë si në vijim:
 - 1.1. Komisioni i zgjedhjeve kërkon nga votuesi të identifikohet me dokument të identifikimit (letërnjoftim, pasaportë, patentë shoferi);
 - 1.2. Komisioni i zgjedhjeve kërkon nga votuesi që të identifikohet me një nga kategoritë e personelit;
 - 1.3. Komisioni i zgjedhjeve e gjen votuesin në listën e votuesve;
 - 1.4. Komisioni zgjedhor kërkon nga votuesi të nënshkruhet në listën e votuesve;
 - 1.5. Komisioni zgjedhor i jep votuesit fletëvotimet e duhura;
 - 1.6. Votuesi voton në kabinën e votimit;



- 1.7. Komisioni zgjedhor zëvendëson një fletëvotim sipas kërkesës nëse votuesi e ka dëmtuar atë dhe për këtë mbanë shënim zyrtarë;
- 1.8. Votuesi e hedhë fletëvotimin në kutinë e votimit;
- 1.9. Votuesi del nga vendvotimi menjëherë pas votimit;
- 1.10. Komisioni zgjedhor shënon në protokoll çdo cënim të këtyre procedurave.

Neni 25

Fletëvotimi dhe vlefshmëria

1. Secili fletëvotim duhet të përmbajë emrat e të gjithë kandidatëve të cilët janë regjistruar për mandate të caktuara. Kandidatët radhiten në fletëvotim sipas alfabetit me emër dhe mbiemër.
2. Secili votues ka të drejtë të votojë në fletëvotim aq kandidatë sa edhe ka mandate në konkurrim në zgjedhjet e caktuara. Një përshkrim i përshtatshëm përkitazi me mënyrën e votimit duhet të jepet në fillim të fletëvotimit.
3. Fletëvotimet janë të vlefshme kur maksimumi i kandidatëve të paracaktuar ose më pak janë votuar.
4. Fletëvotimet nuk janë të vlefshme kur votohen më shumë kandidatë sesa maksimumi i paracaktuar, siç ceket në fletëvotim ose kur nuk votohet asnjë kandidatë ose në raste të tjera të prishjes me qëllim të fletëvotimit, sipas standardëve dhe praktikave të aplikuara nga KQZ e Republikës së Kosovës.

Neni 26

Rezultatet e zgjedhjeve dhe hedhja e shortit

1. Komisioni Qendror i Zgjedhjeve është i obliguar të shpallë rezultatet zyrtare të zgjedhjeve brenda 24 orëve pas mbylljes së vendvotimeve.
2. Në rastet kur dy ose më shumë kandidatë kanë marrë numrin e njëjtë të votave, atëherë duhet të organizohet hedhja e shortit nga ana e Komisionit Qendror të Zgjedhjeve, që do të vendos për ndarjen përfundimtare të mandateve. Ky parim vlen për të gjitha rastet që kanë vota të barabarta në procesin e votimit, sipas kësaj rregulloreje.
3. Shorti duhet të organizohet në prani të kandidatëve. Mos prezenca e kandidatit, pas ftesës në mënyrë të rregullt dhe të sigurt nënkupton heqje dorë nga mandati.



Neni 27

Periudha e ankesave pas shpalljes së rezultateve

1. Pala e pakënaqur me rezultatin e shpallur të zgjedhjeve, ka të drejtë ankesë brenda 2 ditë pune.
2. Pas kalimit të periudhës kohore të përcaktuar në paragrafin 1 të këtij neni, të gjitha ankesat e dorëzuara me shkrim në lidhje me procedurat e zgjedhjeve, rezultatet e votimeve dhe mandatet e fituara do të refuzohen si të pas afatshme.
3. Komisioni Qendror i Zgjedhjeve vendosë për të gjitha ankesat brenda periudhës prej 2 ditëve të punës pas mbylljes së afatit për pranimin e ankesave.
4. Pas përfundimit të periudhës së përcaktuar në paragrafin 1 dhe 3 të këtij neni, Komisioni Qendror Zgjedhor duhet të shpallë rezultatet përfundimtare të zgjedhjeve.

Neni 28

Vlefshmëria e dispozitave të kësaj rregulloreje

1. Dispozitat e këtyre rregullave dhe procedurave vlejné për të gjithë personelin e rregullt të Universitetit "Ukshin Hoti" Prizren.
2. Për të gjitha çështjet të cilat nuk janë përfshirë në këtë rregullore, zbatohen dispozitat e Statutit dhe aktet tjera ligjore dhe nënligjore përkatëse në fuqi.

Neni 29

Disozitat kalimtare

1. Për shkak të numrit të vogël të personelit akademik dhe jo akademik, disa njësi akademike nuk mund të plotësohen me anëtarë të Këshillit të Fakultetit respektivisht numri i lejuar me Statut, atëherë plotësimi i numrit të anëtarëve të Këshillit të Fakultetit bëhet edhe pas periudhës zgjedhore me rastin e pranimin e personelit të rinj bazuar në kërkesën individuale.

Neni 30

Dispozitat përfundimtare

1. Për zbatimin e drejtë të këtyre procedurave kujdeset KQZ dhe subjektet tjera të përcaktuara me këtë rregullore.
2. Interpretimin autentik të kësaj procedure e jep Këshilli Drejtues. Ndërsa, opinionet ligjore i jep KQZ në koordinim me zyrën ligjore të Universitetit.
3. Ndryshimi dhe plotësimi i kësaj Rregulloreje mund të bëhet sipas së njëjtës procedure të miratimit



Neni 31 Hyrja në fuqi

1. Pas certifikimit të zgjedhjeve, vendimet individuale të fituesve të mandateve sipas këtij rregullore hyn në fuqi në momentin e nënshkrimit ndërsa mandate I tyre fillon sipas dispozitave të Statutit të Universitetit.
2. Vendimin mbi zgjedhjen e kryesuesit të përkohshëm e nënshkruan Dekani në detyrë.
3. Vendimin mbi zgjedhjen e anëtarit të Senatit nga radhët e personelit jo akademik e nënshkruan Rektori i Universitetit.
4. Vendimin mbi zgjedhjen e anëtarit të Senatit nga radhët e personelit akademik të njësisë akademik e nënshkruan Dekani në detyrë.
5. Vendimet tjera mbi zgjedhjen e anëtarëve të Këshillit të Fakultetit e nënshkruan kryesuesi i përkohëshëm i Këshillit.
6. Kjo rregullore hyn në fuqi ditën e miratimit nga Këshilli Drejtues i Universitetit "Ukshin Hoti" Prizren.

Prof. Asoc. Dr. Arif Murrija

Kryesues i Këshillit Drejtues

